
Saknr: 2020/48484-1
Saksbehandlar: Kjersti Sognnes

Saksgang

Utval	Utv.saknr.	Møtedato
Hovudutval for næring, naturressursar og innovasjon		14.05.2020

Nærings- og samfunnsutvikling i bygder og lokalsamfunn – og omstillingsarbeid i kommunar

Forslag til vedtak

1. Hovudutvalet legg til grunn at det vert arbeidd vidare med å forme innsatsen innan nærings- og samfunnsutvikling i bygder og lokalsamfunn - og at dette arbeidet vert sett i samanheng med det venta omstillingsarbeidet i utsette kommunar.
2. Hovudutvalet omdisponerer 0,5 mill kr til marknadstiltak for å fremje Vestland som eit attraktivt reisemål for den norske marknaden, dekkja med tidlegare avsette midlar til reiseliv i handlingsprogram for innovasjon og næringsutvikling 2020. Fykesrådmannen får fullmakt til å tildele midlane til marknadstiltak i regi av Fjord Norge og destinasjonsselskapa.

Samandrag

Vi gjev her ei kort oppdatering på arbeidet med lokalsamfunnsutvikling og næringsutvikling i bygder og lokalsamfunn. Dette skal i følgje budsjettokumentet for 2020 sjåast i samanheng med innsatsen inn mot ev kommunar som har særlege utfordringar. Med den utviklinga som skjer i kjølvatnet korona-pandemien vert dette arbeidet viktigare enn noko gong. Og det er i ferd med å peike seg ut kommunar som kan få omstillingsbehov. Dette gjeld m.a. reiselivskommunar og kommunar som er tunge på offshore leverandørindustri. Denne saka er ei lita løypemelding for denne innsatsen, samtidig som vi fremjar ei styrka reiselivsmarknadsføring inn mot den norske marknaden.

Bård Sandal
fylkesdirektør

Endre Høgalmen
seksjonssjef - seksjon for
naturressursar, landbruk og reiseliv

Saksframlegget er godkjent elektronisk og har difor ingen handskriven underskrift

Saksutgreiing

Nærings- og samfunnsutvikling i bygder og lokalsamfunn

I vedteke budsjett for 2020 går det under naturressurs, landbruk og reiseliv fram at vi skal arbeide med lokalsamfunnsutvikling og næringsutvikling i distrikta, som skal styrke lokalsamfunna sin attraktivitet. Dette skal skje i kombinasjon med andre virkemiddel som fylkeskommunen har til rådvelde, mellom anna innsats innan naturbaserte næringar som landbruk, reiseliv og marin sektor. Og i følgje budsjettdokumentet skal ein også sjå denne innsatsen inn mot ev arbeid med kommunar som har særlege utfordringar. I kjølvatnet av korona-pandemien er det i ferd med å peike seg ut kommunar som kan få omstillingsbehov. Dette gjeld m.a. reiselivskommunar og kommunar som er tunge på offshore leverandørindustri. Fylkeskommunen har førebels meldt eit behov for omstillingsmidlar i storleiksorden 20-30 mill kr, inn mot statsbudsjett 2021 og eit program for omstilling i utsette kommunar. Dette arbeidet må sjåast i samanheng med den ovannemnde innsatsen.

Det nemnde innsatsen vil hovudsakleg femne om nærings- og samfunnsutvikling, der vi ser samla på den innsatsen som kan utvikle distrikt og lokalsamfunn. Vi nemner her arbeid innan naturbaserte næringar som m.a. landbruk, marin sektor og reiseliv. I tillegg til arbeid med næringsverksemd og tilrettelegging for næringsmiljø i distrikta snakkar vi om lokalsamfunnsutvikling. Og om god bruk av moderne teknologi. Når det gjeld lokalsamfunnsutvikling har vi utvida eit program som heiter LivOGLyst. Det er no opna for å vere med frå heile Vestland. Vi arbeider med å forme den nemnde innsatsen, og få sett den i samanheng med ein venta omstillingsinnsats i utsette kommunar. Og vi vil halde hovudutvalet oppdatert om det vidare arbeidet.

Omstillingsarbeid i utsette kommunar og område

I kjølvatnet av korona-pandemien og lågare oljeinvesteringar er det venta at ein god del kommunar og område vert varig råka. Fylkeskommunen har derfor bede om statlege midlar til omstilling i kommunar og utsette område. Dette inn mot statsbudsjettet for 2021 og eit nasjonalt omstillingsprogram som ligg under den distriktpolitiske satsinga. Det er i første omgang bedd om 20-30 mill kr, og det vert m.a. synt til dei store utfordringane innan reiseliv og offshore leverandørindustri. Kommunal- og moderniseringsdepartementet forventar ei regional medfinansiering. Fylkeskommunen bør følgeleg planlegge korleis ein skal vere med å delfinansiere dette arbeidet. I særleg utsette kommunar kan ein også vurdere om ein må setje i gong eit omstillingsarbeid i løpet av 2020, før ein vert med i det nasjonale omstillingsprogrammet. Fylkeskommunen følgjer med på utsette kommunar, og vurderer sin innsats.

Reiseliv i ei krevjande tid - styrke innsatsen inn mot den norske marknaden

Fylkeskommunen støttar reiselivet gjennom destinasjonsselskapa, slik at desse skal vere i stand til å støtte og rådgje reiselivsbedriftene i ei krisetid. Og slik at dei kan vere med å planlegge korleis ein skal få oppatt aktiviteten, dvs marknadsarbeid. Det vart i denne samanhengen etablert ei tilskotsordning for støtte til destinasjonsselskapa, og det vart lyst ut midlar. Den aktuelle støtta er no tildelt. Det er elles trong for ein styrka marknadsinnsats inn mot den nasjonale marknaden. Hovudutvalet for næring gjorde slikt vedtak 16.april: «Hovudutvalet ser det som nødvendig å gjennomføre særskilte marknadstiltak for å fremja Vestland som attraktivt reisemål for den norske marknaden. Tiltak bør gjennomførast så raskt som råd er og ha prioritet.» I samband med handlingsprogrammet for innovasjon og næringsutvikling vart det sett av midlar til reiseliv, m.a. nokre tiltak der ein no ikkje treng fullt så mykje midlar som følgje av korona-situasjonen. Fylkesdirektøren tilrår å omdisponere 0,5 mill kr av desse inn mot marknadstiltak for å fremje Vestland som eit attraktivt reisemål for den norske marknaden. Vi har også utfordra Fjord Norge til å omdisponere det som dei kan frå internasjonal marknadsføring til nasjonal innsats. Og fylkeskommunane på Vestlandet skal snarleg ha eit møte med Fjord Norge for m.a. å drøfte ein god innsats mot den nasjonale marknaden.

Vedtakskompetanse: hovudutvalet har vedtakskompetanse.

Økonomi: løyving dekkja av midlar i handlingsprogram for innovasjon og næringsutvikling 2020.

Klima: ikkje så relevant her.

Konklusjon

Det vert arbeidt vidare med å forme innsatsen innan nærings- og samfunnsutvikling i bygder og lokalsamfunn, og dette vert sett i samanheng med det venta omstillingsarbeidet i utsette kommunar. Og det vert omdisponert 0,5 mill kr til marknadstiltak for å fremje Vestland som eit attraktivt reisemål for den norske marknaden.